

五

倫

書

五倫書卷之三

老聃曰。聖人無常心。以百姓心為心。○我無為
而民自化。我好靜而民自正。我無事而民自
富。我無欲而民自朴。

荀況曰。天地為大矣。不誠則不能化萬物。聖人
為知矣。不誠則不能化萬民。○夫誠者君子
之所守。而政事之本也。○公生明。偏生闇。○

聖也者。盡倫者也。王也者。盡制者也。兩盡者。是以爲天下極矣。○選賢良。舉篤敬。興孝悌。收孤寡。補貧窮。如是。則庶人安政矣。庶人安政。然後君子安位。○君人者。欲安。則莫若平政。愛民矣。欲榮。則莫若隆禮敬士矣。欲立功名。則莫若尚賢使能矣。是君人者大節也。○仁眇天下。故天下莫不親也。義眇天下。故天下莫不貴也。威眇天下。故天下莫敢敵也。以不敵之威。輔服人之道。故不戰而勝。不攻而

得甲兵不勞而天下服。是知王道者也。○王者之論無德不貴。無能不官。無功不賞。無罪不罰。朝無幸臣。民無幸生。尚賢使能而等威不遺。析愿禁悍而刑罰不過。百姓曉然皆知為善於家而取賞於朝也。為不善於幽則蒙刑於顯也。夫是之謂定論。是王者之論也。○足國之道。節用裕民而善藏其餘。節用以禮裕民以政。○輕田野之稅。平關市之征。省商賈之數。罕興力役。無奪農時。如是則國富矣。

○先王明禮義以一之。致忠信以愛之。尚賢使能以次之。爵服慶賞以申重之。時其事。輕其任。以調齊之。潢然無覆之。養長之。如保赤子。若是故姦邪不作。盜賊不起。而化善者勸勉矣。○君者儀也。儀正而景正。君者槩也。槩圓而水圓。君者盂也。盂方而水方。○君者人之源也。源清則流清。源濁則流濁。故有社稷者而不能愛人。不能利人。而求人親愛於己。不可得也。○諫爭輔拂之人。社稷之臣也。國

君之寶也明君之所尊厚也○明主尚賢使
能而饗其盛○兵者所以禁暴除害也故仁
人之兵所存者神所過者化若時雨降莫不
說喜○故為人上者必將慎禮義務忠信然
後可此君人者之大本也○脩其道行其義
興天下之同利除天下之同害而天下之同
歸也○上者下之本也上宣明則下治辨矣
上端誠則下愿慤矣上公正則下易直矣治
辨則易一愿慤則易使易直則易知易一則

彊易使則功易知則明是治之所由生也

賈山曰天子之尊養三老視孝也立輔弼之臣者恐驕也置直諫之士者恐不得聞其過也學問至於芻蕘者求善無廢也商人庶人誹謗已而改之從善無不聽也

賈誼曰建久安之勢成長治之業以承祖廟以奉六親至孝也以幸天下以育羣生至仁也立經陳紀輕重同得後可以為萬世法程雖有愚幼不肖之嗣猶得蒙業而安至明也○

禮者禁於將然之前而法者禁於已然之後
○慶賞以勸善刑罰以懲惡先王執此之政
堅如金石行此之令信如四時據此之公無
私如天地○為人主計者莫如先審取舍取
舍之極定於內而安危之萌應於外矣○以
禮義治之者積禮義以刑罰治之者積刑罰
刑罰積而民怨背禮義積而民和親故世主
欲民之善同而所以使民善者或異或道之
以德教或毆之以法令道之以德教者德教

治而民氣樂。毆之以法令者。法令極而民風哀。哀樂之感。禍福之應也。

董仲舒曰。王者欲有所為。宜求其端於天。天道之大者。在陰陽。陽為德。陰為刑。刑主殺而德主生。是故陽常居大夏。而以生育長養為事。陰常居大冬。而積於空虛。不用之處。以此見天之任德不任刑也。○為人君者。正心以正朝廷。正朝廷以正百官。正百官以正萬民。正萬民以正四方。四方正。遠近莫不一於正。而

無有邪氣奸其間者是以陰陽調而風雨時
羣生和而萬民殖諸福之物可致之祥莫不
畢至而王道終矣○天者羣物之祖故徧覆
包函而無所殊聖人法天而立道亦溥愛而
無私○王者上謹於承天意以順命也下務
明教化民以成性也正法度之宜別上下之
序以防欲也脩此三者而大本舉矣

公孫弘曰因能任官則分職治去無用之言則
事情得不作無用之器則賦斂省不奪民時

不妨民力則百姓富有德者進無德者退則
朝廷尊有功者上無功者下則羣臣逡罰當
罪則奸邪止賞當賢則臣下勸○人主和德
於上百姓和合於下故心和則氣和氣和則
形和形和則聲和聲和則天地之和應矣故
陰陽和風雨時五穀登六畜蕃嘉禾興朱草
生山不童澤不涸此和之至也

王吉曰宣德流化必自近始朝廷不備難以言
治左右不正難以化遠○謹選左右審擇所

使左右所以正身。所使所以宣德。

說苑人君之道清淨無為。務在博愛。趨在任賢。
廣開耳目以察萬方。○大道容衆大德容下。
聖人寡為而天下理矣。○夫有文無武無以
威下有武無文民畏不親文武俱行威德乃
成。既成威德民親以服。○明主者有三懼一
曰處尊位而恐不聞其過。二曰得意而恐驕。
三曰聞天下之至言而恐不能行。○有國者
不可以不學春秋。○聖人之於天下百姓也。

其猶赤子乎。飢者則食之。寒者則衣之。將之
養之。育之。長之。唯恐其不至於大也。○聖王
貴德而務施。緩刑辟而趨民時。○王者盛其
德而遠人歸。故無憂。○聖王先德教而後刑
罰。立榮恥而明防禁。崇禮義之節。以示之。賤
貨利之弊。以變之。○有功而不賞。則善不勸。
有過而不誅。則惡不懼。○利之勿害。成之勿
敗。生之勿殺。與之勿奪。樂之勿苦。喜之勿怒。
此治國之道。使民之義也。愛之而已矣。○善

為國者遇民如父母之愛子。兄之愛弟。聞其飢寒為之哀。見其勞苦為之悲。○賢君之治國。其政平。其吏不苛。其賦歛節。其自奉薄。不以私善害公法。賞賜不加於無功。刑罰不施於無罪。不因喜以賞。不因怒以誅。害民者有罪。進賢舉過者有賞。後宮不荒。女謁不聽。上無姪慝。下不陰害。不幸宮室以費財。不多觀游臺池以罷民。不彫文刻鏤以逞耳目。官無腐蠹之蔽。國無流餓之民。此賢君之治國也。

○將治大者不治小。成大功者不小苛。○為國之道。食有勞而祿有功。使有能而賞必行。罰必當。○善言進。則不善無由入矣。不進善言。則善無由入矣。○明王之施德而下下也。將懷遠而致近也。○明君在上下有直辭。君上好善。民無諱言。○聖人重誠敬。慎所忽。○德行廣大而守以恭者。榮。土地博裕而守以儉者。安。祿位尊盛而守以卑者。貴。人衆兵強而守以畏者。勝。聰明睿智而守以愚者。益博。

聞多記而守以淺者廣○聖王之舉事必先
諦之於謀慮而後考之於蓍龜○上不玩兵
下不廢武○聖人之治天下也先文德而後
武力凡武之興為不服也文化不改然後加
誅○王者知所以臨下而治衆則羣臣畏服
矣知所以聽言受事則不蔽欺矣知所以安
利萬民則海內必定矣○道之所在天下歸
之德之所在天下貴之仁之所在天下愛之
義之所在天下畏之○明君之制賞從重罰

從輕食人以壯為量。事人以老為程。○節欲而聽諫。敬賢而勿慢。使能而勿賤。○古者聖王既臨天下。必變四時。定律曆。考天文。揆時變。登靈臺。以望氣。氣。○聖王脩禮文。設庠序。陳鐘鼓。天子辟靡。諸侯泮宮。所以行德化。新序賢聖之君。不以祿私親。功多者授之。不以官隨愛。能當者處之。故曰。察能而授官者。成功之君也。○聖人不易民而教。知者不變法而治。因民而教者。不勞而功成。據法而治者。

吏習而民安之

匡衡曰。治天下審所上而已。教化之流。非家至而人說之也。賢者在位。能者在職。朝廷崇禮百僚。敬讓道德之行。由內及外。自近者始。然後民知所法。遷善日進而不自知也。朝廷天下之楨榦也。公卿大夫相與循理恭讓。則民不爭好仁樂施。則下不暴上。義高節。則民興行。寬柔和惠。則衆相愛。四者明王之所以不嚴而成化也。○欽翼祗栗事天之容也。溫

恭敬遜承親之禮也。正恭嚴恪臨衆之儀也。嘉惠和悅饗下之顏也。舉措動作物遵其儀。故形為仁義動為法則。

楊雄曰：天下為大治之在道，不亦小乎？四海為遠治之在心，不亦迩乎？導之以仁，則下不相賊；涖之以廉，則下不相盜；臨之以正，則下不相詐；脩之以禮義，則下多德讓。

諸葛亮曰：治世以大德，不以小惠。親賢臣，遠小人，此先漢之所以興隆也；親小人，遠賢臣，此後漢之所以衰敗也。

此後漢之所以傾頽也

王通曰推之以誠則不言而信鎮之以靜則不行而謹惟有道者能之○古之為政者先德而後刑故其人悅以恕○志以成道言以宣志詔其見王者之志乎其恤人也周其致用也悉一言而天下應一令而不可易非仁智博達則天明命其孰能詔天下乎○天子必有師然亦何常師之有惟道所存以天下之身受天下之訓得天下之道成天下之務民

王制書卷三
十
不知其由也。其惟明主乎。○禮其皇極之門
乎。聖人所以嚮明而節天下也。其得中道乎。
故能辨上下定民志。

張蘊古大寶箴有曰。大明無私照。至公無私親。
故以一人治天下。不以天下奉一人。禮以禁
其奢。樂以防其欲。左言而右事。出警而入譴。
四時同其慘舒。三光同其得失。又曰。勿謂無
知。居高聽卑。勿謂何害。積小就大。又曰。勿內
荒於色。勿外荒於禽。勿貴難得貨。勿聽亡國

音。又曰。勿謂我尊而傲賢慢士。勿謂我智而拒諫矜己。又曰。衆棄而後加刑。衆悅而後行賞。弱其強而治其亂。伸其屈而直其枉。

陸贄曰。君人之柄。在明其德威。立國之權。在審其輕重。德與威不可偏廢也。○捨己以從衆。違欲以遵道。遠憚佞而親忠直。推至誠而去逆詐。杜諂沮之路。廣諫諍之門。掃求利之法。務息人之術。錄片善。片能。以盡群材。忘小瑕。小怨。俾無棄物。○總天下之智。以助聰明。順

天下之心以施教令○從義如轉圜進善如
不及推廣此道之致和平○古之聖王之居
人上也必以其心從天下之心而不敢以天
下之人從其欲○君人者以衆智為智以衆
心為心恒恐一夫不盡其心一事不得其理
孜孜訪問唯善是求豈但從諫弗咈而已哉
○愚智兼納洪纖靡遺蓋之如天容之如地
垂旒黻纁而黜其聰察匿瑕藏疾而務於包
涵不示威而人畏之如雷霆不用明而人仰

之如日月。此天子之德也。○君人之道。子育
為心。雖深居九重。而慮周四表。雖恒處安樂
而憂及困窮。○理國。化人。在於獎一善。使天
下之為善者。勸。罰一惡。使天下之為惡者。懲。
是以爵人。必於朝。刑人。必於市。惟恐衆之不
覩。事之不彰。○君天下者。必以天下之心。為
心。而不私其心。以天下之耳目。為耳目。而不
私其耳目。故能通天下之志。盡天下之情。○
立國而不先養人。國固不立矣。養人而不先

足食。人固不養矣。足食而不先備災。食固不足矣。爲官而備者。人必不贍。爲人而備者。官必不窮。

韓愈曰。聖人一視而同仁。篤近而舉遠。○道莫大乎仁義教。莫大乎禮樂刑政。施之於天下。萬物得其宜。措之於其躬。體安而氣平。○善醫者不視人之瘠肥。察其脉之病否而已矣。善計天下者不視天下之安危。察其紀綱之理亂而已矣。

柳宗元曰聖人之所以立天下曰仁義仁主恩
義主斷恩者親之斷者宜之而理道畢矣○
聖人之道不窮異以為神不引天以為高利
於人備於事如斯而已矣○聖人之為賞罰
者非也所以懲勸者也賞務速而後有勸罰
務速而後有懲○聖人有制度有法令過則
為辟故立大中者不尚異教人者欲其誠
李德裕丹扆六箴其宵衣箴曰先王聽政昧爽
以俟雞鳴既盈日出而視伯禹大聖寸陰為

貴。光武至仁。反仄不忌。無俾姜后。獨去簪珥。
彤管記言。克念前志。正服箴曰。聖人作服。法
象可觀。雖在宴游。尚不懷安。汲黯莊色。能正
不冠。楊阜慨然。亦譏縹紉。四時所御。各有其
官。非此勿服。惟辟所難。罷獻箴曰。漢文罷獻。
詔還駟駟。鑾輅徐驅。焉用千里。厥後令王。亦
能恭已。翟裘既焚。筒布則毀。道德惟麗。慈儉
為美。不過天道。斯為至理。納誨箴曰。惟后納
誨。以求厥中。從善如流。乃能成功。漢驚沉湎。

舉白浮鍾。魏叡侈汰。凌霄作宮。忠雖不忤。善亦不從。以規為瑱。是謂塞聰。辨邪箴曰。居上處深。在察微萌。雖有讒慝。不能蔽明。漢之孝昭。叡過周成。上書知詐。照奸得情。燕蓋既折。王猷治平。百代之後。乃流淑聲。防微箴曰。天子之孝。敬遵王度。安必思危。乃無遺慮。亂臣猖獗。非可遽數。玄服莫辨。觸瑟始仆。柏谷微行。豺豕塞路。覩貌獻殄。斯可戒懼。

劉蕡曰。為君者所發必正言。所履必正道。所居

必正位。所近必正人。○事天地以教人恭奉宗廟以教人孝。養高年以教人弟。長字百姓以教人慈幼。

歐陽脩曰。為人君者。以細務而責人。專大事而獨斷。此致治之要術也。納一言而可用。雖衆說不得以沮之。此力行之果斷也。知此二者。天下無難治矣。○善為天下慮者。不敢忽於微而杜其漸也。○治天下者。用人非一端。故取士非以一路。若夫知錢穀曉刑獄。熟民事。

精吏幹勤勞夙夜以辦集為功者謂之材能之士。明於仁義禮樂通於古今治亂其文章論議與之謀議天下之事可以決疑定策論道經邦者謂之儒學之臣。善用人者必使有材者竭其力有識者竭其謀。○取士之方必求其實用人之術當盡其材。○人主之善馭下者常欲聞難言之言然後下無隱情上無壅聽姦宄不作禍亂不生。○禮以治民而樂以和之德義仁恩長養涵澤此三代之所以

深於民者也。○治天下在明號令。正朝廷在脩紀綱。號令所行。紀綱所振。由人主有賞罰之柄也。○刑者聖人所以愛民之具也。其禁暴止殺之意。必本乎至仁。

周敦頤曰。聖人在上。以仁育萬民。以義正萬民。○心純則賢才輔。賢才輔則天下治。純心要矣。用賢急焉。○古者聖王制禮法。脩教化。三綱正。九疇叙。百姓太和。萬物咸若。○治天下有本身之謂也。治天下有則家之謂也。本必

端端本誠心而已矣。則必善。善則和親而已矣。家難而天下易。家親而天下疏也。○聖人之道。仁義中正而已矣。○天道行而萬物順。聖德脩而萬民化。

程顥曰。人主當防未萌之欲。及勿輕天下之士。○君道以至誠仁愛為本。○人主之學。唯當務為急。辭命非所先也。○王道坦然。本乎人情。出乎禮義。若履大路而行。無復回曲。

程頤曰。君道在乎稽古正學。明善惡之歸。辨忠

邪之分。趨道之正。又在乎君志先定。定志者。正心誠意。擇善而固執之也。惟以聖人之訓。為必當從。先王之治。為可法而已。然天下之患。常生於忽微。而志亦戒乎漸習。故古之君。出入閒燕。必有誦訓箴諫之官。左右前後。無非正人。以成德業。○聖人視億兆之心。猶一心者。通於理而已。○夫以一人之身。臨乎天下之廣。若區區自任。豈能周於萬事。故自任其知者。適是為不知。唯能取天下之善。任天

下之聰明則無所不周○人君欲觀已之施
為善否當觀於民民俗善則政化善也○聖
人養賢才與之共天位使之食天祿俾施澤
於天下養賢以及萬民也養賢所以養萬民
也○夫居上位者必有才德威望為民所尊
畏則事行而衆心服從○古之聖人設前旒
屏樹者不欲明之盡乎隱也○王者法天道
行寬宥施恩惠養育兆民○人君至誠益於
天下天下之人無不至誠愛戴以君之德澤

為恩惠也○豐大之道唯王者能致之所有
既大其保之治之之道亦當大也故王者之
所尚至大也○人主所以有崇高之位者蓋
得之於天與天下之人共戴也必思所以報
民古之人君視民如傷若保赤子皆是報民
也○治身齊家以至平天下者治之道也建
立治綱分正百職順天時以制事至於創制
立度盡天下之事者治之法也聖人治天下
之道唯此二端而已○為民立君所以養之

也。養民之道在愛其力。民力足則生養遂。生養遂則教化行而風俗美。故為政以民力為重也。○善言治天下者不患法度之不立而患人材之不成。○聖人脩己以敬以安百姓。篤恭而天下平。惟上下一於恭敬則天地自位。萬物自育。氣無不和。四靈何有不至。此體信達順之道。聰明睿知皆由是出。以此事天饗帝。

張載曰。天道四時行。百物生。無非至教。聖人之

動無非至德○中正然後能貫天下之道此
君子所以大居正也○為政必身倡之且不
愛其勞又益之以不倦○唯君子為能與時
消息順性命躬天德而誠行之也○能通天
下之志者為能感人心聖人同乎人而無我
故和平天下莫盛於感人心○凡天下疲癯
殘疾惛獨鰥寡皆吾兄弟之顛連而無告者
也于時保之于之翼也○尊高年所以長其
長慈孤弱所以幼吾幼

邵雍曰。用天下之目為目。其目無所不觀矣。用天下之耳為耳。其耳無所不聽矣。用天下之口為口。其口無所不言矣。用天下之心為心。其心無所不謀矣。○聖人所以能立無過之地者。以其善事乎心者也。○上好德則民用正。上好佞則民用邪。

司馬光曰。王者以仁義為麗。道德為威。○選賢而進之。量能而任之。成功者賞。敗官者誅。此人君之職也。○人君之尊與天地同體。以剛

健為德以厚重為威照微當如日月發言當
如雷霆○信者人君之大寶也國保於民民
保於信○人君之職量材而授官一也度功
而加賞二也審罪而行罰三也材有短長故
官有能否功有高下故賞有厚薄罪有大小
故罰有輕重此三者人君所當用心○天子
之於萬國能褒善而黜惡抑強而輔弱撫服
而懲違禁暴而誅亂然後發號施令而四海
之內莫不率從○為人君者視天下有一事

不治以為已過有一民失所以為已憂天下
已安已治矣猶復思將來之患而豫防之○
明主謀事於始而慮患於微是以用力不勞
而收功甚大○仁者非嫗煦姑息之謂也興
教化脩政治養百姓利萬物此人君之仁也
○國之至治在於審官官之得人在於選士
士之嚮道在於立教教之歸正在於擇術○
繼體之君謹守祖宗成法苟不隳之以逸欲
敗之以讒諂則世世相承無有窮期○切直

之言。非人臣之利。乃國家之福。是以人君夙
夜求之。懼弗得聞。○古之聖王。尊禮黃髮。屬
任以政者。蓋以更歷天下之事。練習為治之
體故也。○天下重器也。得之至艱。守之至艱。
今民有十金之產。猶以為先人所營。苦身勞
志。謹而守之。不敢失墜。況於承祖宗艱難之
業。奄有四海。傳祚萬世。可不重哉。可不慎哉。
○聖人當國家隆盛之時。則戒懼彌甚。故能
保其令聞永久無疆矣。○凡守太平之業者。

其術無他。如守臣室而已。今有臣室於此。將以傳之子孫。為無窮之規則。必植其堂基。壯其柱石。強其棟梁。厚其茨蓋。高其垣墉。嚴其關鍵。既成。又擇其子孫之良者。使謹而守之。日省月視。款者扶之。弊者補之。如是則亘千萬年。無頽壞也。夫民者國之堂基也。禮法者柱石也。公卿者棟梁也。官吏者茨蓋也。將帥者垣墉也。甲兵者關鍵也。是六者不可不朝念而夕思也。○聖帝明王。皆消惡於未萌。弭

禍於未形。天下陰被其澤。而莫知其所以然也。○宴安怠惰。肇荒淫之基。奇巧珍玩。發奢泰之端。甘言卑辭。啓僥倖之徒。附耳屏語。開讒賊之門。不惜名器。導僭逼之源。假借威福。授陵奪之柄。凡此六者。其初甚微。朝夕狎翫。未覩其害。日滋月益。遂至深固。比知而革之。用力百倍矣。○為國家者。必先實而後文也。安國家利百姓。仁之實也。保基緒傳子孫。孝之實也。辨貴賤立紀綱。禮之實也。和上下親

遠近樂之實也。決是非明好惡政之實也。詰
奸邪禁暴亂刑之實也。察言行試政事求賢
之實也。量材能課功狀審官之實也。詢安危
訪治亂納諫之實也。選勇果習戰鬪治兵之
實也。實之不存雖文之盛美無益也。

曾鞏曰。為政之要莫如得人。百官稱職則萬務
咸治。○官久於其業而後明功久於其事而
後成。○名正然後位定位定然後事舉。

蘇軾曰。王者所宜先者德也。所宜後者刑也。所

宜先者義也。所宜後者利也。○聖人之治天下。寬猛相資。君臣之間。可否相濟。○聖人之治天下。使天下之事各當其處。而不相亂。天下之人各安其分。而不相躡。然後天子得優游無為。而制其上。○古之人君。收天下之英雄。而不失其心。故天下皆爭歸之。○得人之道。在於知人。知人之法。在於責實。○凡舉大事。必順天心。天之所向。以之舉事。必成。

蘇轍曰。聖人欲有其富。則保之以儉。欲久其尊。

則守之以謙。欲安其佚。則行之以勞。欲得其
欲。則濟之以無欲。○聖人之為天下。不務逆
人之心。人心之所向。因而順之。人心之所去
因而廢之。故天下樂從其所為。○善治天下
者。必明於天下之情。而後得御天下之術。

胡安國曰。為國以義。不以利。如以利。則上下交
征。而國必危矣。○舉動人君之大節。賢哲量
之以行。蔽其道。奸邪窺之以作。止其惡。四隣
望之以厚薄。其情故有國者。必謹於禮。而後

動此守身之本。保國之道也。○明君以務學為急。聖學以立心為要。○克謹天戒。則雖有其象而無其應。弗克畏天災咎之來必矣。○天人一理也。萬物一氣也。觀於陰陽寒暑之變。以察其消息盈虛。此制治於未亂。慎於微之意也。○善善而不能用。則無貴於知其善。惡惡而不能去。則無貴於知其惡。

范祖禹曰。君人者。如天運於上。而四時寒暑各司其序。則不勞而萬物遂矣。○朝廷者。四方

之極也。非至公無以絕天下之私。非至正無以止天下之邪。○治天下之繁者必以至簡。制天下之動者必以至靜。○危則懼。懼則善心生。安則泰。泰則逸心生。○古者聖王正身齊家以率天下。其身不正未有能正人者。君者本也。民者末也。君者源也。民者流也。本正則末正。源清則流清矣。是以先王之治必反求諸己。己正則物莫不應矣。○富而逸者民之所欲也。與其所欲去其所惡而不王者。

未之有也○明君用人而不自用故恭己而成功多疑之君自用而不用人故勞心而敗事○聖人順天理而感人心斂天下之賢者而聚之於朝使之施其所有以爲國之有則賢者無不得其所而民物亦無不得其所矣○天地之有四時百官之有六職天下萬事備盡於此如網之在綱衆之挈領雖百世不可易也○明王道天下而使之言故國家可得而治也○天子所以制御天下者賞善罰

惡辨是非枉直使人各得其所物各安其分而不相陵暴也

李侗曰。治道必以明天理正人心崇節義厲廉恥為先。本末備具可舉而行。非特空言而已。胡寅曰。為天養人者天子之職也。○帝王之德莫不本於格物致知以誠其意正心脩身以齊其家。若夫正朝廷正百官以正萬民則自是而推之矣。○人主必昭儉德以照臨百官清心寡欲不殖貨利而用君子立乎朝廷則

寵賂之門自塞矣○人君莫大乎脩身而脩
身莫先於寡欲欲誠不行則心虛而善入氣
平而理勝動無非禮事無不善唐虞之治不
越此矣○聖主憂其所當憂然後能樂其所
可樂○人君躬行於上卿大夫表式於下以
明習人倫為要則三代教化之實也○君以
養人為職凡為人害者必去之○國之興也
未有不由親賢○自古人君待遇臣下其禮
雖一然嚴威儼恪常施於爪牙甲冑之士以

折其驕悍難使之氣柔異謙屈常施於林壑
退藏之人以厲其廉靖無求之節故能駕馭
人才表正風俗○上好儉而民財豐節力役
而民力裕

胡宏曰聖人理天下以萬物各得其所為至極
○欲撥亂興治者當正大綱知大綱然後本
可正而末可定○為天下者必本於理義理
也者天下之大體也義也者天下之大用也
理不可以不明義不可以不精理明然後紀

網可正。義精然後權衡可平。紀綱正。權衡平。則萬事治。百姓服。四海同。○天下有三大。大本也。大幾也。大法也。大本一心也。大幾萬變也。大法三綱也。有大本然後可以有天下。見大幾然後可以取天下。行大法然後可以理天下。

朱熹曰。上有信以惠于下。則下亦有信以惠於上矣。○以仁為體。則無不在所愛之中。故足以長人。○天下之事。其本在於一人。而一人

之身其主在於一心。故人主之心一正則天下之事無有不正。○綱紀不能以自立。必人主之心術公平正大。無偏黨反側之私。然後綱紀有所繫而立。君心不能以自正。必親賢臣遠小人。講明義理之歸。閉塞私邪之路。然後乃可得而正也。○先王養民之政。導其妻子使之養其老而恤其幼。不幸而有鰥寡孤獨之人。無父母妻子之養。尤宜憐恤。○君之於民一視同仁。凡有材能。皆使進善。則人材

衆多而國賴以興也○欲成天下之務則必
從善去惡進賢退奸然後可以有濟○王者
知有天而畏之言行必信政教必立喜怒必
公用舍必當黜陟必明賞罰必行○克己自
新蚤夜思省舉心動念出言行事之際常若
皇天上帝臨之在上宗社神靈守之在傍懍
懍然不復敢使一毫私意萌於其間○民之
視效在君天之視聽在民

張栻曰德者所以為民極也○國之所以為國

者以天序天秩實維持之也○善政立而後善教可行所謂富而教之也

呂祖謙曰人主常與慈祥篤實之人處其所以興起善端涵養德性鎮其躁而消其邪日改月化有不在言語之間者矣○人主進德之驗他未即見惟於諫者之言先見之言之委曲遷就是君德未信於人而猶有所畏也言之剴切侵訐是君德已信於人而既無所畏也

真德秀曰。聖人之治天下。莫不欲歸吾仁。而其
行則自近始。故親親而仁民。仁民而愛物。其
序不可紊也。○人君為天下民物之主。痒癢
疾痛。孰非同體。故君道必主於仁。而為仁必
極其至。○為人君者。不以己之樂為樂。而以
天下之樂為樂。不以己之憂為憂。而以天下
之憂為憂。○人主之心。與天地相為流通。而
善惡吉凶之符。甚於影響。○居中而制事者。
心也。古先聖王。必於此乎用力。故一心正而

萬事莫不正○有修德之實心然後有修德之實事。有愛民之實心然後有愛民之實事。未有無是心之實而能有其事之實者也○人主以實心為善則人自孚。以實德示民則人自化○明君在上。既擇天下英賢委以股肱之任。而又選公清直亮之士使為耳目之官。二者交舉其職而無阿黨朋比之私。則紀綱張治道立矣○惟人主之觀人也。不以文章而以德行。不以虛譽而以實功。不以承迎

已意為善而以規弼已過為忠○人主脩德
講學則天下安○昆蟲草木亦得其所

五倫書卷之三

五倫書卷之四

黃帝生而神靈弱而能言幼而徇齊長而敦敏
成而聰明

顓頊靜淵以有謀䟽通而知事

帝嚳生而神靈自言其名普施利物不於其身
聰以知遠明以察微順天之義知民之急仁

而威惠而信。脩身而天下服。取地之財而節用之。撫教萬民而利誨之。歷日月而迎送之。明鬼神而敬事之。其色郁郁。其德嶷嶷。其動也時。其服也士。帝既同既執中而徧天下。日月所照。風雨所至。莫不服從。

唐堯放勳。欽明文思安安。允恭克讓。光被四表。格于上下。○帝德廣運。乃聖乃神。乃武乃文。○巍巍乎唯天為大。唯堯則之。蕩蕩乎民無能名焉。○其仁如天。其知如神。就之如日。望

之如雲。富而不驕。貴而不舒。

虞舜重華協于帝。濬。招。文明。溫恭。允塞。玄德升聞。○帝德罔愆。臨下以簡。御衆以寬。○好問而好察。邇言。隱惡而揚善。執其兩端。用其中於民。○善與人同。舍己從人。樂取諸人。以爲善。

夏禹敏給克勤。其德不違。其仁可親。其言可信。聲爲律。身爲度。

商湯克寬克仁。彰信兆民。○懋昭大德。建中于

民以義制事。以禮制心。○肇脩人紀。從諫弗
咈。先民時若。居上克明。為下克忠。與人不求
備。檢身若不及。○克齊聖。廣淵撫民。以寬除
其邪虐。功加于時。德垂後裔。○執中立。賢無
方。

周王季克明。克類克長。克君王。此大邦克順。克
比。

文王若日月之照臨。光于四方。顯于西土。○
克明德。慎罰。不敢侮鰥寡。庸庸。祗祗。威威。顯

民○穆穆文王。於緝熙敬止○不大聲以色。
不長夏以革。不識不知。順帝之則○於乎不
顯。文王之德之純○視民如傷。望道而未之
見

武王能繼先王之德。而配三后于京。故詩人
美之曰。王配于京。世德作求。永言配命。成王
之孚。成王之孚。下土之式。永言孝思。孝思維
則○不泄邇。不忘遠

成王祗勤于德。夙夜不逮。詩人頌之曰。夙夜

王伯元
基命宥密。於緝熙。單厥心。肆其靖之。

漢高祖寬仁愛人意。豁如也。○有大度。不事家人生業。而性明達。奸謀能聽。

文帝恭脩玄默。以道德為麗。以仁義為準。光武身濟大業。兢兢如不及。明慎政體。撓攬權綱。量時度力。舉無過事。

明帝善刑理。法令分明。日晏坐朝。幽枉必達。內外無倖曲之私。在上無矜大之色。

章帝事從寬厚。感陳寵之義。除慘獄之科。深

元元之愛著胎養之令。平徭簡賦。人賴其慶。而又體之以忠恕。文之以禮樂。故乃蕃輔克諧。群后德讓。

唐高祖倜儻不羈。豁達大度。至性剛直。無所矯飾。志略弘遠。寬仁容衆。凡有委任。推以赤心。皆許便宜從事。未嘗限以文法。

太宗聰明英武。有大志而能屈節下士。進賢任能。厲精為政。求士若不及。從諫如轉圜。玄宗生而聰明睿哲。及長。寬仁孝友。識度弘。

遠英武果斷不拘小節

肅宗聰明秀異英睿有謀略仁愛孝友得之天性

憲宗剛明果斷自幼即位慨然發憤志平僭叛能用忠謀不惑羣議卒收成功

宋太祖仁孝豁達有大度專務愛養民力削藩鎮之權專用儒臣分理郡國務農興學慎罰薄歛與世休息三代而降文物仁義之風無讓漢唐云

太宗親錄囚徒。洞察微隱。斷決庶事。日旰忘食。宮嬪簡省。日用儉素。布褐紬條。內服絕綃。屢經澣濯。乘輿器仗。無所損益。抑祥瑞之獻。卻尊美之號。樂忠讜之言。徵遺逸之士。其於文籍。尤所篤好。

仁宗恭儉仁恕。敬天重民。在位四十二年。忠厚惻怛。所以培國本者厚矣。謚之曰仁。誠無愧焉。

高宗恭儉仁厚。繼體守文。為有餘。

寧宗池臺苑囿無所增益。府庫之財未嘗妄費。常以愛民為心。每遇水旱。憂形于色。御衆臨下。率從寬簡。

理宗表章理學。使濂洛考亭之道大明於天下。傳之後世。廟號曰理。固其宜也。

元憲宗剛明雄毅。沉斷寡言。不樂宴飲。不好侈靡。

世祖度量弘廣。知人善任。使信用儒術。愛養黎庶。每遇災傷。免租賑飢。惟恐不及。

仁宗天性慈孝。聰明恭儉。通達儒術。平居服御質素。澹然無欲。不事遊畋。不喜征伐。不崇貨利。有司奏大辟。為之慘惻者久之。

國朝。

太祖高皇帝生而神明。即位以來。昧爽臨朝。日晏忘食。虛心清問。從善如流。神謀睿斷。昭見萬里。退朝之暇。即延接儒生。講論經典。取古帝王嘉言善行。書寘殿廡。出入省觀。斥侈靡。絕游幸。卻異味。罷膳樂。泊然無所好。敦行儉。

朴。以身為天下先。

太宗文皇帝外嚴內仁。而雄材大畧。條理精密。知人善任。使推誠待下。凡所委用。非浸潤所能間。讒諛之人。終見疎斥。矜過誤。畧小罪。不以私愛蔽大惡。聽言之際。明睿所照。不待其盡。洞見底蘊。臨機剛果。裁制大事。數語而決。與下人言。開心寫誠。表裏明白。蓋唐虞三代以來。若漢之高帝。世祖。唐之文皇。宋之太祖。其寬仁大度。聰明文武。閎遠之規。乾剛之用。

帝皆兼而有之

仁宗昭皇帝。天稟純明。孝友之行。出於至性。在
儲位二十年。深明人君之道。暨嗣位。勵志圖
治。推誠任人。每曰。為人君。止於仁耳。故弘施
霈澤。悉罷科買。已逋責。詢民隱。急農事。褒舊
勞。舉墜典。屢飭法司。崇寬厚。戒深刻。惟日以
恤人為務。

聖學

商高宗命傅說曰。來汝說。台小子舊學于甘盤。

既乃遯于荒野。入宅于河。自河徂亳。暨厥終
罔顯。爾惟訓于朕志。若作酒醴。爾惟麴蘖。若
作和羹。爾惟鹽梅。爾交脩予罔予棄。予惟克
邁乃訓。說曰。王人求多聞。時惟建事。學于古
訓。乃有獲。事不師古。以克永世。匪說攸聞。惟
學遜志。務時敏。厥脩乃來。允懷于茲。道積于
厥躬。惟數學半。念終始。典于學。厥德脩罔覺。
周武王召師尚父。太公望問曰。昔黃帝顓頊之
道存乎。師尚父曰。在丹書。王欲聞之。則齋矣。

王齋三日。端冕。師尚父亦端冕。奉書而入。道書之言曰。敬勝怠者吉。怠勝敬者滅。義勝欲者從。欲勝義者凶。王聞之。惕若恐懼。退而為戒書於席之四端。為銘焉。○王訪于箕子曰。於乎。箕子。惟天陰騭。下民相協。厥居。我不知其彛。倫攸叙。箕子乃言曰。我聞在昔。鯀陞洪水。汨陳其五行。帝乃震怒。不畀洪範。九疇。彛倫攸斁。鯀則殛死。禹乃嗣興。天乃錫禹洪範九疇。彛倫攸叙。

成王受羣臣之戒作敬之之詩而自為答之
之言曰維予小子不聰敬止日就月將學有
緝熙于光明佛時仔肩示我顯德行

列國魯哀公問子夏曰必學而後可以安國保
民乎子夏曰不學而能安國保民者未嘗聞
也哀公曰然則五帝三王有師乎子夏曰有
臣聞黃帝學乎大真顓頊學乎綠圖帝嚳學
乎赤松子堯學乎尹壽舜學乎務成跼禹學
乎西王國湯學乎成子伯文王學乎鉸時子

斯武王學乎郭射。此數聖人未遭此師。則功業不著乎天下。名號不傳乎千世。夫不學不明。古道而能安國家者。未之有也。

漢宣帝甘露三年。詔諸儒講五經異同於石渠閣。帝親稱制臨決。立梁丘易。夏侯尚書。穀梁春秋博士。

光武受尚書通大義。召桓榮入說甚善。之朝會輒令敷奏經義。

章帝初即位。降意儒術。特好古文。尚書左氏

傳詔賈逵入講北宮白虎觀。南宮雲臺。帝善逵說。又詔羣臣及諸生諸儒講議五經同異。帝親稱制臨決。作白虎議奏。

唐太宗身屬橐鞬。銳情經術。即王府開文學館。召名儒十八人為學士。與議天下事。既即位。殿左置弘文館。悉引內學士番宿更休聽朝。之間與討論古今。道前王所以成敗。或日仄夜。艾未嘗少怠。嘗謂侍臣曰。梁武帝惟談苦空。元帝為周師所圍。猶講老子。此深足為戒。

朕所好者惟堯舜周孔之道。如鳥之有翼。魚之有水。不可暫無耳。又曰。若不甲夜視事。乙夜觀書。何以為人君也。

玄宗開元三年。謂宰相盧懷慎曰。朕每讀書。有所疑滯。無從質問。可選儒學之士。日使入內侍讀。懷慎薦太常卿馬懷素。遂以懷素為左散騎常侍。與褚無量更日侍讀。

代宗自幼好學。樂善強記。及長。博通經籍。尤精易象。而溫恭簡敬。動必由禮。

憲宗留意典墳。每覽前代興亡得失之事。皆三復其言。及觀貞觀開元實錄。見太宗撰金鏡書及帝範。玄宗撰開元訓誡。遂採尚書春秋史漢等書。君臣行事可為龜鏡者。集成十四篇。曰君臣道合。辨邪正。戒權幸。慎微行。任賢臣。納忠諫。謹征伐。重刑法。去奢泰。崇節儉。獎忠直。脩德政。簡畋獵。錄勲賢。分為上下卷。目曰前代君臣事迹。書於屏風。列之座右。穆宗嘗謂兵部侍郎薛放曰。為學經史何先。

放對曰。經者古先聖之至言。多仲尼所發明。皆天人之極致。誠萬代不刊之典也。史則歷紀成敗。雜書善惡。各錄當時之事。亦足鑒其興亡。帝曰。六經所尚不一。志學之士。白首不能盡通。如何得其要。對曰。論語者。六經之精華。孝經者。人倫之大本。窮理執要。真可謂聖人至言。是以漢朝論語首列學官。光武令虎賁之士。皆習孝經。玄宗親為孝經注解。皆使當時大治。海內久安。人知孝節。氣感和樂之

所致也。帝曰。聖人謂孝為至德要道。其信然矣。

宋太祖初為周將時。酷好看書。雖在軍中。手不釋卷。聞人有奇書。不吝千金購之。顯德初。從世宗平淮。有人譖之曰。趙某私有重車數乘。世宗遣人察之。果有籠篋數車。令引入面開之。唯書數千卷。世宗異之。且曰。卿方為朕將帥。當堅甲利兵。何用書為。太祖頓首謝曰。第無奇謀上贊聖德。所以聚書觀覽者。欲廣聞

見增智慮也。世宗曰善。

太宗雅好文史。於禁中建清心殿。收藏圖籍。以資觀覽。視朝之暇。必讀太平御覽三卷。有所闕廢。即進補之。雖隆冬短晷。必足其數。大臣請少息。曰。朕開卷有得。不以為勞也。

真宗嘗講春秋畢。邢昺曰。春秋一經。少有人聽。多或中輟。帝曰。勤學有益。最勝他事。且深資政理。無如經書。朕聽政之暇。惟文史是樂。講論經藝。以日繫時。寧有倦耶。

仁宗嘗命講官講無逸篇曰朕深知享國之君宜戒逸豫侍臣楊安國曰舊有無逸圖宜書于屏間帝曰朕不欲坐席背聖人之言當置之左右又命學士丁度取孝經之天子孝治聖治廣要道四章為圖朝夕閱之嘗以賈昌朝為崇政殿說書昌朝以傳註訓詁不為曲釋至先王治心脩身經理天下之意指物引喻析毫解縷帝獨意嚮堯舜三代昌朝以經開說所質問皆道德之要

英宗以近英講讀論語畢。賜執政講讀官左
右史御筵於資善堂。內出御書唐人詩分賜
在坐。翌日呂公著上奏曰。陛下日新典學。誠
以堯舜三代為法。則四海不勞而治。將來論
語終帙。進講尚書二書。皆聖人之格言。為君
之要道。臣輒於其中。及孝經內節要語。共一
百段。進呈。聖人之言。本無可去取。臣今惟取
明白切於治道者。庶便於省覽。或遊意筆硯
之間。以備揮染。亦日就月將之一助也。

神宗天性好學。至日晏忘食。英宗常遣內侍止之。帝正衣冠拱手。雖大暑未嘗用扇。時孫思恭為侍讀。一日講孟子至多助之至天下順之。寡助之至。親戚畔之。思恭泛引古今助順之事。而不及親戚畔之者。帝顧曰。微子紂之諸父也。抱祭器而入。周非親戚畔之耶。思恭再拜稱服明睿。

哲宗時起居舍人王巖叟嘗因侍講奏曰。陛下退朝無事。不知何以消日。帝曰。看文字。巖

叟對曰。陛下以讀書為樂。天下幸甚。聖賢之學。非造次可成。須在積累。積累之要在專與勤。屏絕他好。始可謂之專。久而不倦。始可謂之勤。願陛下特留意。帝深然之。

孝宗檢身不懈。數御經筵。留意講誦。嘗語大臣曰。人主讀書罕知道。雖知之亦罕能行之。或惟作歌詩如陳隋之君。竟亦何補。唐德宗亦知學。然所行不至。與陸贄論事。皆下人傳旨。事之是非。反覆詰難。猶恐未盡。傳旨豈能

盡。帝嘗御選德殿。取尚書及資治通鑑孜孜讀之。法其所以興。戒其所以亡。口誦心思。未嘗一日去手。

寧宗為王時。深慕秘閣脩撰朱熹之學。每講官進講。必問熹說何如。及即位。熹進大學講義。一日啓上曰。臣所進講義於聖意何如。上曰。其要只在求放心。熹頓首曰。陛下天縱生知。舉此正是要領。願推之以見於行。理宗持身甚嚴。雞三鳴往決政事。退入講堂。

講官講經史終日手不釋卷率以為常

元世祖嘗暮召平章政事不忽木坐寢榻下陳說四書及古史治亂至丙夜不寐帝喜曰朕所以令卿從許平仲學正欲卿以嘉言入告朕耳

裕宗少從姚樞竇默受孝經及終卷世祖大悅設食饗樞等及封燕王守中書令兼判樞密院每與諸王近臣習射之暇輒講論經典若資治通鑑貞觀政要主恂許衡所述遼金

帝王行事要略。下至武經等書。從容聽言之。間苟有允愜。未嘗不為之洒然改容。

文宗嘗曰。昔我祖宗睿知聰明。其於致理之道。自然生知。朕以統緒所傳。實在眇躬。夙夜憂懼。自惟早歲跋涉艱阻。視我祖宗既乏生知之明。於國家治體。豈能周知。故立奎章閣。置學士。負日以祖宗明訓。古昔治亂得失。陳說於前。使朕樂於聽聞。

國朝丙午五月。

太祖皇帝命有司訪求古今書籍藏之秘府以資覽閱因謂侍臣詹同等曰三皇五帝之書不盡傳於世故後世鮮知其行事漢武帝購求遺書而六經始出唐虞三代之治始得而見武帝雄才大略後世罕及至表章六經開闡聖賢之學有功於後世又曰吾每於宮中無事輒取孔子之言觀之如節用而愛人使民以時真治國之良規萬世之師法也○吳元年九月癸卯新城內殿成命博士熊鼎編

類古人行事可為鑒戒者書于壁間。又命侍臣書大學衍義於兩廡壁間。

太祖曰：前代宮室多施繪畫，予用此以備朝夕觀覽，豈不愈於丹青乎？○洪武二年三月戊申，謂翰林侍讀學士詹同曰：古人為文章或以明道德，或以通當世之務，如典謨之言皆明白易知，無深怪險僻之語。至如諸葛孔明出師表，亦何嘗雕刻為文，而誠意溢，出至今使人誦之自然忠義感激。近世文士不究道

德之本。不達當世之務。有詞雖艱深。意實淺近。即使過相如楊雄。何裨實用。自今翰林為文。但取通道理。明世務。無事浮藻。○二十年二月甲辰。御註尚書洪範成。先是命儒臣書洪範揭於御座之右。朝夕觀覽。乃自為註。至是成。召贊善劉三吾曰。朕觀洪範一篇。帝王為治之要道也。所以叙彝倫。立皇極。保萬民。叙四時。成百穀。本於天道。而驗於人事。箕子為武王陳之。武王猶自謙曰。五帝之道。我未

能焉。朕每為惕然。遂疏其旨為註。朝夕省覽。
三吾對曰。

陛下留心是書。上明聖道。下福生民。為萬世開
太平者也。

永樂四年正月丙申。

太宗皇帝謂侍臣曰。朕昨閒暇作書。愛制筆精
妙。甚稱人意。因嘆匠藝如此。豈是生而能之。
亦由精學所致。今之學者。不及古人。政由自
怠之過。前代大儒君子。皆是積勤以造其極。

今人鹵莽厭煩用力未至便謂求道之難譬
之耕而不勤可望有獲乎

五倫書卷之四